

Bosna i Hercegovina
Federacija Bosne i Hercegovine
TUZLANSKI KANTON
Ministarstvo prostornog uređenja i zaštite okolice

N A C R T

Z A K O N

**O PROGLAŠENJU DIJELA PODRUČJA PLANINE KONJUH
ZAŠTIĆENIM PEJZAŽOM „KONJUH“**

Tuzla, decembar 2008. godine

NACRT

Na osnovu člana 24. stav (1) tačka c) Ustava Tuzlanskog kantona ("Službene novine Tuzlansko-podrinjskog kantona", broj: 7/97 i 3/99 i "Službene novine Tuzlanskog kantona", broj: 13/99, 10/00, 14/02, 06/04 i 10/04) na prijedlog Vlade Tuzlanskog kantona, Skupština Tuzlanskog kantona, na sjednici održanoj _____ godine, donosi

ZAKON**O PROGLAŠENJU DIJELA PODRUČJA PLANINE KONJUH
ZAŠTIĆENIM PEJZAŽOM „KONJUH“****I - PREDMET****Član 1.**

- (1) Ovim zakonom proglašava se Zaštićenim pejzažom "Konjuh" (u daljem tekstu: Zaštićeni pejzaž), dio planine Konjuh i utvrđuju granice obuhvata, kategorija zaštićenog područja, zoniranje područja, mjere zaštite, intervencije u zaštićenom području, korištenje prirodnih vrijednosti, upravljanje, nadzor, vlasništvo, naknade i kazne za prekršaje za pravna i fizička lica.
- (2) Zaštićeno područje iz stava (1) ovog člana uživa posebnu zaštitu i koristi se pod uslovima i na način propisan zakonom.

II – POJAM I CILJEVI UTVRĐIVANJA ZAŠTIĆENOG PEJZAŽA**Član 2.**

- (1) Zaštićeni pejzaž je kopneno područje nastalo međusobnim djelovanjem prirode i čovjeka sa izuzetnim estetskim, ekološkim i/ili kulturnim vrijednostima i sa velikom biološkom raznolikošću.
- (2) Zaštićeni pejzaž utvrđuje se s ciljem:
 - a) Održavanja usklađenosti međusobnog djelovanja prirode i kulture putem zaštite pejzaža i tradicionalnog korištenja zemljišta, građenja, te društvenih i kulturnih manifestacija;
 - b) Izvođenja ekonomskih aktivnosti u skladu sa prirodom i očuvanjem kulturnog sistema zajednica;
 - c) Održavanja raznolikosti pejzaža i staništa, srodnih vrsta i ekosistema;
 - d) Eliminiranja i sprečavanja korišćenja zemljišta i aktivnosti koje nisu

- u skladu sa ciljevima upravljanja i omogućavanja rekreacije i turizma koje odgovara kategoriji područja;
- e) Podsticanja naučnih i edukativnih aktivnosti za dobrobit stanovništva za duži vremenski period;
 - f) Učešća javnosti u zaštiti okolice Zaštićenog pejzaža;
 - g) Omogućavanja beneficija kroz osiguranje prirodnih izvora (kao što su šume i ribe) i usluga (kao što su čista voda ili prihodi od turizma u cilju održive upotrebe tog područja) za lokalnu zajednicu.

Član 3.

U Zaštićenom pejzažu, radi svog posebnog značaja, kao primjeri dijelova prirode izdvajaju se:

- a) pećina u Brateljevićima,
- b) pećina „Bebrava“,
- c) izvorište mineralne vode "Muška voda"
- d) planinsko jezero "Jezero na Konjuhu" i
- e) rijetke i endemske vrste flore i faune.

III - GRANICE ZAŠTIĆENOG PEJZAŽA

Član 4.

- (1) Zaštićeni pejzaž, u širem geografskom smislu, smješten je u centralnim dijelovima planine Konjuh.
- (2) U hidrografskom pogledu Zaštićeni pejzaž obuhvata u svom sjevernom dijelu slivno područje rijeke Oskova, a u južnom dijelu slivno područje rijeke Drinjača - gornji dio sliva rijeke Drinjače i slivna područja Krabanje i Velike Zlaće.
- (3) U topografskom pogledu pripada brdsko-planinskom regionu sa apsolutnim nadmorskim visinama od 300 do 1328 m n.v.
- (4) Ukupna površina Zaštićenog pejzaža iznosi 8,016,61 ha, a prostire se na dijelovima teritorije općina Kladanj, Banovići i Živinice.

Član 5.

- (1) Granice Zaštićenog pejzaža cijelim svojim dijelom su određene karakterističnim tačkama i oblicima reljefa zaštićenog područja kao što su grebeni, kote, vidikovci, kose, zaravni, platoi i dr.
- (2) Granica polazi sa lokaliteta Hrvatska brana preko kote 511 m n.v. „Gradina“, ide Mačkovac kosom, zatim na kote 656 i 1053 m n.v. „Zelenboj“, dalje se spušta u potok Višnjik do kote 996 m n.v. „Kalem“, zatim grebenom preko kote 1009 m n.v. „Ploč“ i izlazi na kotu 1104 m n.v. „Ravni bor“. Zapadno od ove kote prateći planinsku stazu nastavlja do kote 1084 m n.v. „Šuplji bor“

i izlazi na kotu 1167 m n.v. „Zidine“. Desnom stranom zaravni ide planinarskom stazom do najdominantnije kote 1328 m n.v. „Konjuh“.

- (3) Prateći greben spušta se na kotu „Bijelo brdo“, odakle se spušta glavnim grebenom do potoka. Granica nastavlja u pravcu glavnog puta i pritoke Miljevica, zatim presijecajući glavni put ide nizvodno do rijeke Kikanovac. Odavde nastavlja širinom 100 m od rijeke sve do mosta kod izvora Zeleni vir, zatim se penje grebenom na kotu 1008 m n.v. i nastavlja zapadno do prve zaravni odakle se grebenom spušta u pravcu ušća Katranice u Srebrenicu. Od Srebrenice granica nastavlja dominantnim grebenom i penje se do kote 1109 m n.v. „Velika crna stijena“ odakle se grebenom u pravcu istoka spušta u pravcu pritoke Borovnica. Iz Borovnice nastavlja prvim grebenom do zaravni i dalje u pravcu istoka po izohipsi 750 sve do ušća Borovnice u Drinjaču.
- (4) Granica izlazi na kotu 874 m n.v. „Zagradac“ grebenom presijecajući šumski put do trećeg mosta na rijeci Bebroštica. Uzvodno kanjonom Bebroštice nastavlja u širini 100 m do kanjona Bebroštice sve do četvrtog mosta gdje se odvaja u pravcu istoka do kote 896 m n.v. „Negaja“, dalje do kote 943 m n.v. „Vis“, nastavlja do zaravni iznad južnog dijela sela Brateljevići prateći šumsku stazu spušta se preko kote 843 m n.v. „Krst“ do Radova sela i rječice Bukovica.
- (5) Granica nastavlja prvim grebenom do kote 1106 m n.v. „Garež“ pa se spušta u pravcu juga do kote 1061 m n.v. „Karaula“, zatim pod oštrim uglom mijenja smijer prema sjeveru praveći zavoj i izlazi na kotu 892 m n.v. i povijajući se prema zapadu spušta se do korita Bukovice nastavljajući do sela Brateljevići, odnosno do rijeke Drinjače.
- (6) Odavde ide uzvodno 100 m od korita Drinjače do ušća pritoke Bebroštica odakle se grebenom penje do kote 869 m n.v. i nastavlja preko Osjelina do kote 1058 m n.v. „Plosno brdo“.
- (7) Dalje, granica ide grebenom na kotu 1053 m n.v. šumskim putem na kotu "Piskavica" i na kotu 1017 m n.v. zatim šumskom stazom do kote 1102 m n.v. „Golo brdo“. Granica se zatim penje do kote 1137 „Bukovica“, nastavlja na istok do kote 908 m n.v. izlazeći na kotu 1080 m n.v. „Škrilo“.
- (8) Odavde se granica spušta prvim grebenom u potok nastavljajući kolskim putem iznad sela Brdijelji do platoa Kuman i dalje šumskim putem do kote 1207 m n.v. „Bandjera“. Dalje nastavlja rubom platoa Javorje, preko kota 1194 m n.v., 1037 m n.v. „Široka ravan“, 954 m n.v. i 941 m n.v. do lokaliteta Miljkovac.
- (9) Odavde ide šumskim putem do kote 977 m n.v. „Trošni kamen“, zatim preko Brezovih plana do kote 917 m n.v. „Omrići“ izlazeći šumskom stazom preko Zaloma do kote 832 m n.v. „Jelova glava“ spuštajući se grebenom do lokaliteta Pasji do, te presijecajući Pasji do nastavlja u pravcu sjevera dolinom rijeke Oskove, zatvarajući granicu na lokalitetu Hrvatska brana.

IV - ZONIRANJE ZAŠTIĆENOG PODRUČJA

Član 6.

Zavisno od stepena zaštite, u okviru granica Zaštićenog pejzaža, utvrđuju se tri zaštićene zone:

- a) prva zaštićena zona (zona A),
- b) druga zaštićena zona (zona B) i
- c) treća zaštićena zona (zona C).

A. Prva zaštićena zona

Član 7.

- (1) Prva zaštićena zona (zona A) predstavlja prostor najviših vrijednosti, koje moraju ostati u potpunosti očuvane.
- (2) Zona A se sastoji od 7 prostornih cjelina međusobno nepovezanih označenih kao: A1, A2, A3, A4, A5, A6 i A7.
- (3) Zona A1 je najveća prostorna cjelina zone A i najvećim svojim dijelom prostire se na slivna područja vodotoka Velika Zlaća i Mala Zlaća, a manjim dijelom u području potoka Skakavac.
- (4) Zona A2 je u zaštićenom području prostorno definisana kotama 977 m n.v. „Trošni kamen“, 917 m n.v., 893 m n.v., 832 m n.v., 852 m n.v. i završava na koti 977 m n.v. „Trošni kamen“.
- (5) Zona A3 je na užem kaptaznom području izvorišta „Muška voda“ i nastavlja se dijelom u uskom pojasu rijeke Drinjače.
- (6) Zona A4 se prostire u slivnom području rječice Srebrenica, pritoke Drinjače.
- (7) Zona A5 je veoma mala prostorna cjelina locirana ispod kote 874 m n.v. „Zagradac“.
- (8) Zona A6 je u prostoru uskog dolinskog pojasa vodotoka Bebroštica uključujući i neposredno područje oko pećinskog sistema „Bebrava“.
- (9) Zona A7 je zaštitno područje spomeničkog lokaliteta „Djevojačka pećina“, kao i drugih speleolških objekata u neposrednoj blizini. Svojim južnim krakom ova zaštićena prostorna cjelina obuhvata slivno područje vodotoka Gluha Bukovica, kao vodoopskrbnog prirodnog sistema općine Kladanj.

Član 8.

Osnovne vrijednosti prve zaštićene zone čine:

- a) Geološka raznolikost i prirodno naslijeđe na zaštićenom području:
 - 1) prirodne vrijednosti geomorfološkog karaktera (pećine, vrtače, jame),
 - 2) izražena geološka profilacija terena,
 - 3) varijabilnost reljefnih i orografskih formi.

- b) Visok stepen florističke raznolikosti:
 - 1) rijetke biljne vrste: bosanski ljiljan, bosanska perunika, sunovrat, iva, lincura, hrizanteme,
 - 2) rijetke i reliktno biljne zajednice: šume bijelog i crnog bora na pridotitu i serpentitu.

- c) Ornitološke karakteristike:
 - 1) reliktno vrste ptica: veliki tetrijeb, lještarka i tropski djetlić,
 - 2) ugrožene vrste ptica: veliki tetrijeb, sivi soko, planinska sova, lještarka,
 - 3) rijetke i ugrožene vodene životinje: vidra, riječni rak, autohtona potočna pastrmka i potočna mrenica.

- d) Hidrološke karakteristike:
 - 1) planinska izvorišta čiste vode,
 - 2) izvorište mineralne vode „Muška voda“,
 - 3) prirodna planinska jezerca,
 - 4) vodene sesije (vodopadi i skakavci),
 - 5) atraktivnost vodotoka (Drinjača i Oskova sa pritokama), te izvornost dolinskog pejzaža i riječnih korita.

B. Druga zaštićena zona

Član 9.

(1) U drugoj zaštićenoj zoni (zona B) se prvenstveno ostvaruje očuvanje i zaštita izvornog stanja prirode, koji je dovoljno očuvan kako za konzervaciju osnovnih sistema tako i eko-sistema, te pruža mogućnost za istraživanja, edukaciju i fizičku i duhovnu rekreaciju.

(2) Zona B zauzima oko polovine cjelokupnog zaštićenog područja.

(3) Na području općine Banovići najvećim dijelom zauzima dio slivnog područja Oskove i veći dio slivnog područja vodotoka Krabanja.

(4) Najveći dio zone B lociran je na području općine Kladanj zauzimajući cjelokupan središnji i zapadni dio zaštićenog područja.

Član 10.

Osnovne vrijednosti druge zaštićene zone čine:

- a) Geološka raznolikost i prirodno naslijeđe na zaštićenom području:
 - 1) prirodne vrijednosti geomorfološkog karaktera (pećine, vrtache, jame),
 - 2) izražena geološka profilacija terena,
 - 3) varijabilnost reljefnih i orografskih formi.
- b) Visok stepen florističke raznolikosti:
 - 1) rijetke biljne vrste: bosanski ljiljan, bosanska perunika, sunovrat, iva, lincura, hrizanteme,
 - 2) rijetke i reliktno biljne zajednice: šume bijelog i crnog bora na priroditu i serpentitu.
- c) Ornitološke karakteristike:
 - 1) reliktno vrste ptica: veliki tetrijeb,
 - 2) ugrožene vrste ptica: veliki tetrijeb, sivi soko, planinska sova, lještarka.
- d) Rijetke i ugrožene vodene životinje: vidra, riječni rak, autohtona potočna pastrmka i potočna mrenica.
- e) Ugrožene vrste životinja: bosanska divokoza i bosanski mrki medvjed.
- f) Hidrološke karakteristike:
 - 1) planinska izvorišta čiste vode,
 - 2) prirodna planinska jezerca,
 - 3) atraktivnost vodotoka (Drinjača i Oskova sa pritokama), te izvornost dolinskog pejzaža i riječnih korita.

C. Treća zaštićena zona

Član 11.

- (1) Treća zaštićena zona (zona C), je namijenjena prvenstveno za turizam, sport i rekreaciju.
- (2) Zona C je podijeljena na dvije prostorne cjeline: C1 i C2.
- (3) Zona C1 zauzima uski sjeverni dio zaštićenog područja u općini Banovići i to od lokaliteta Hrvatska brana, pa do rekreativnog platoa objekta „Zlaća“.
- (4) Zona C2 je na području općine Kladanj i zauzima uski dolinski pojas Drinjače i trasu puta Kladanj – „Muška voda“.
- (5) Svojim položajem, oblikom, reljefom i veličinom zaštićena zona C, odnosno njezine prostorne cjeline C1 i C2, imaju isključivo kontaktno-receptivnu funkciju Zaštićenog pejzaža.

Član 12.

(1) Za Zaštićeni pejzaž bit će donesen poseban Prostorni plan Zaštićeni pejzaž „Konjuh“.

(2) Karta područja Zaštićeni pejzaž, razmjere 1 : 25.000 se čuva u Ministarstvu prostornog uređenja i zaštite okolice Tuzlanskog kantona (u daljem tekstu: Ministarstvo).

V - MJERE ZAŠTITE

Član 13.

U prvoj zaštićenoj zoni (zoni A) mjere zaštite obuhvataju konzervaciju specifičnih prirodnih obilježja, a odnose se na:

- a) zabranu svih aktivnosti koje bi mogle narušiti postojeće eko-sisteme,
- b) zabranu sječe šume, iskorjenjivanje ili bilo kakvo oštećenje stabla osim uzgojne i sanitarne sječe,
- c) zabranu eksploatacije mineralnih sirovina,
- d) zabranu iskorištavanja fosilnih resursa,
- e) zabranu lova i ribolova,
- f) zabranu sakupljanja ljekovitih biljaka,
- g) zabranu sakupljanja gljiva,
- h) zabranu prikupljanja primjeraka divlje flore i faune,
- i) zabranu namjernog unošenja invazivnih vrsta,
- j) zabranu pašarenja,
- k) zabranu izgradnje,
- l) zabranu mijenjanja mreže vodotoka,
- m) zabranu kaptiranja postojećih vrela, izuzev izvorišta „Muška voda“ i postojećih kaptiranih izvorišta za vodosnabdijevanje stanovništva,
- n) zabranu saobraćaja motornim vozilima, osim iz člana 17. stav 1. tačka f),
- o) zabranu upotrebe otvorenog plamena i
- p) zabranu upotrebe hemijskih sredstava osim dozvoljenih i odlaganje otpada.

Član 14.

U drugoj zaštićenoj zoni (zoni B) mjere zaštite obuhvataju očuvanje i zaštitu izvornog stanja, a odnose se na:

- a) zabranu sječe šume (osim sanitarne sječe),
- b) zabranu lova i ribolova,
- c) zabranu sakupljanja ljekovitih biljaka,
- d) zabranu prikupljanja primjeraka divlje flore i faune,
- e) zabranu unošenja invazivnih vrsta,
- f) zabranu masovnog saobraćaja putničkim vozilima,
- g) zabranu izgradnje u zonama postojećih vrela,
- h) zabranu svih ostalih aktivnosti koje mogu remetiti namjenu zone.

Član 15.

Mjere zaštite u trećoj zaštićenoj zoni su usmjerene na očuvanje prve i druge zaštićene zone i održavanje izvornog stanja, a obuhvataju zabranu privrednih i drugih aktivnosti koje nisu usklađene sa statusom zaštićenog područja.

Član 16.

U okviru granica Zaštićenog pejzaža, šumskoprivredne osnove, lovnoprivredne osnove i vodoprivredne osnove, uskladit će se sa mjerama zaštite utvrđenim zakonom.

VI - INTERVENCIJE U ZAŠTIĆENOM PODRUČJU

A. Dozvoljene aktivnosti u prvoj zaštićenoj zoni

Član 17.

U prvoj zaštićenoj zoni (zoni A) dozvoljene aktivnosti su:

- a) odstranjivanje bolesnih stabala u cilju konzervacije zdravstvenog stanja sastojina,
- b) košenje,
- c) oplemenjivanje - ekološka restauracija postojećih vodotoka i jezera,
- d) fizička i duhovna rekreacija,
- e) unapređenje infrastrukture (staze, klupe) za rekreaciju,
- f) saobraćaj posebnim vozilima uz odobrenje Upravitelja,
- g) postavljanje informativnih sadržaja od prikladnih materijala,
- h) razvoj centralizovanog upravljanja otpadom i
- i) uspostava elektro-instalacija u formi koja će biti uklopljena u ekološko-prostorni element.

B. Dozvoljene aktivnosti u drugoj zaštićenoj zoni

Član 18.

U drugoj zaštićenoj zoni (zoni B) dozvoljene aktivnosti su:

- a) sanitarna sječa i sječa u skladu sa šumskoprivrednom osnovom,
- b) ekstenzivno pašarenje,
- c) košenje,
- d) edukacija i istraživanje,
- e) izgradnja edukacionih centara,
- f) saobraćaj uz odobrenje Upravitelja,
- g) održavanje postojeće saobraćajne infrastrukture,
- h) izgradnja turističke infrastrukture koja može biti ambijentalno uklopljena.

C. Dozvoljene aktivnosti u trećoj zaštićenoj zoni

Član 19.

U trećoj zaštićenoj zoni (zoni C) dozvoljene aktivnosti su:

- a) izgradnja turističkih, sportskih, kulturnih i rekreacionih objekata za ljetnji i zimski turizam, koji će biti ambijentalni i izgrađeni u skladu sa planskom dokumentacijom,
- b) sječa šume uz odobrenje Upravitelja,
- c) poljoprivredna proizvodnja (ratarstvo),
- d) razvoj male privrede i kućnih radinosti,
- e) izgradnja stambenih naselja za domicilno stanovništvo,
- f) izgradnja nove i održavanje postojeće saobraćajne infrastrukture i
- g) izgradnja javnih parking prostora za posjetioce.

VII - KORIŠTENJE I UPRAVLJANJE

Član 20.

Korištenje prirodnih vrijednosti u granicama Zaštićenog pejzaža dozvoljeno je samo ako nije u suprotnosti sa ciljevima i mjerama zaštite utvrđenim zakonom i drugim propisima.

Član 21.

Upravljanje Zaštićenim pejzažom povjerava se Javnoj ustanovi Zaštićeni pejzaž „Konjuh“ (u daljem tekstu: Upravitelj), koju osniva Skupština Tuzlanskog kantona.

Alternativa:

Upravljanje Zaštićenim pejzažom povjerava se Javnom preduzeću „Šume Tuzlanskog kantona“ d.d. Kladanj (u daljem tekstu: Upravitelj).

A. Plan upravljanja Zaštićenim pejzažom

Član 22.

- (1) Plan upravljanja Zaštićenim pejzažom donosi Vlada Kantona.
- (2) Plan upravljanja određuje razvojne smjernice, način izvođenja zaštite, korištenja i upravljanja zaštićenim područjem, te smjernice za zaštitu i očuvanje prirodnih vrijednosti zaštićenog područja uz uvažavanje potreba lokalnog stanovništva.
- (3) Plan upravljanja sadrži: ciljeve i politiku upravljanja zaštićenim područjem, smjernice održivog upravljanja zaštićenim područjem, smjernice za realizaciju plana.

Član 23.

(1) Upravitelj Zaštićenog pejzaža donosi Pravilnik o unutrašnjem redu unutar područja Zaštićenog pejzaža, u roku od tri mjeseca od donošenja Plana upravljanja, uz saglasnost Ministarstva.

(2) Pravilnikom o unutrašnjem redu iz stava (1) ovog člana uređuju se detaljno pitanja zaštite, očuvanja i unapređenja i korištenja područja Zaštićenog pejzaža.

Član 24.

Upravitelj je dužan, u skladu sa zakonom, izvršiti vidljivo obilježavanje granica Zaštićenog pejzaža, kao i zaštićenih zona (A, B i C).

B. Sredstva za obavljanje poslova zaštite

Član 25.

(1) Potrebna sredstva za obavljanje poslova zaštite Zaštićenog pejzaža osigurat će se u Kantonalnom fondu za zaštitu okolice, a do osnivanja Kantonalnog fonda za zaštitu okolice u Ministarstvu.

(2) Upravitelj će donijeti godišnji plan finansijskih sredstava potrebnih za realizaciju Plana upravljanja.

(3) Saglasnost na godišnji plan daje Vlada Kantona na prijedlog Ministarstva.

(4) Upravitelj je dužan o svim aktivnostima podnositi tromjesečni izvještaj Ministarstvu.

C. Koncesije

Član 26.

Vlada Kantona može dati koncesiju za korištenje i izgradnju hotela i ostalih turističkih objekata, prostore za sport i rekreaciju, korištenje ljekovitih termalnih i mineralnih voda u zoni C, u skladu sa zakonom.

VIII - VLASNIŠTVO I NAKNADE

Član 27.

(1) Vlasništvo nad nekretninama u zaštićenom području mogu sticati pravna i fizička lica u skladu sa zakonom.

(2) Vlasnik nekretnina u zaštićenom području dužan je u slučaju prodaje ponuditi svoju imovinu prvenstveno Vladi FBiH, odnosno Vladi Kantona.

(3) Ukoliko subjekti iz stava (2) ovog člana ne prihvate ponudu u roku od 60 dana od dana prijema ponude, vlasnik svoju imovinu može prodati drugom pravnom ili fizičkom licu.

(4) Vlasnik zaštićenog dijela prirode dužan je prihvatiti bez naknade određivanje granica zaštićenog područja i dozvoliti pristup tom dijelu područja radi zadovoljavanja naučnih, edukativnih, estetskih i kulturnih potreba društva.

A. Pravo na naknadu

Član 28.

(1) Ako je korištenje nekretnina u okviru zaštićenog područja ograničeno ili zabranjeno, vlasnik ima pravo na naknadu zbog ograničenja kojima je podvrgnut.

(2) Visina naknade iz stava (1) ovog člana mora biti srazmjerna umanjenom prihodu i utvrđuje se sporazumno između vlasnika i Upravitelja.

(3) U slučaju spora o visini naknade odlučuje nadležni sud.

(4) Naknada se isplaćuje iz sredstava Kantonalnog fonda za zaštitu okolice, odnosno Ministarstva.

IX - NADZOR

Član 29.

(1) Nadzor nad provođenjem odredaba zakona i propisa donesenih na osnovu ovog zakona vrši Ministarstvo.

(2) Poslove inspekcijuskog nadzora vrši nadležni kantonalni inspektor (u daljem tekstu: inspektor).

A. Nadležnost

Član 30.

U vršenju inspekcijuskog nadzora inspektor vrši kontrolu:

- a) korištenja i upotrebe Zaštićenog pejzaža,
- b) stanja kvaliteta prirode i provođenja mjera zaštite prirode,
- c) da li su saglasnosti za aktivnosti u zaštićenim područjima izdate u skladu sa zakonom i drugim propisima.

B. Prava i obaveze inspektora

Član 31.

U vršenju inspekcijskog nadzora inspektor ima pravo i obavezu da svojim rješenjem:

- a) naredi preduzimanje mjera radi usklađivanja aktivnosti u skladu sa zakonom i drugim propisima,
- b) privremeno obustavi aktivnosti koje nisu u skladu sa odredbama zakona i drugih propisa,
- c) privremeno, do konačne odluke nadležnog organa, oduzme predmete kojima je učinjen prekršaj,
- d) preduzme druge mjere određene zakonom.

X - KAZNENE ODREDBE

Član 32.

(1) Novčanom kaznom od 1.000,00 KM do 10.000,00 KM kaznit će se za prekršaj pravno lice ako:

- a) vrši sječu šume (član 13. tačka b, član 14. tačka a),
- b) vrši eksploataciju mineralnih sirovina (čl.13. tačka c),
- c) iskorištava fosilne resurse (čl. 13. tačka d),
- d) vrši lov i robolov (čl.13. tačka e, član 14. tačka b),
- e) vrši sakupljanje ljekovitih biljaka i gljiva (čl. 13. tačka f i g, član 14. tačka c),
- f) unosi invazivne vrste (čl. 13. tačka i, član 14. tačka e),
- g) vrši prikupljanje primjeraka divlje flore i faune (član 13. tačka h, član 14. tačka d),
- h) vrši pašarenje (član 13. tačka j),
- i) mijenja mrežu vodotoka (čl. 13. tačka l),
- j) kaptira postojeća vrela (čl.13. tačka m),
- k) saobraća motornim vozilima (čl. 13. tačka n) i
- l) koristi otvoreni plamen član (13. tačka o).

(2) Za prekršaj iz stava (1) ovog člana kaznit će se i odgovorno lice u pravnom licu novčanom kaznom od 200,00 KM do 1.000,00 KM.

(3) Novčanom kaznom od 100,00 KM do 500,00 KM kaznit će se za prekršaj fizičko lice koje vrši radnje iz stava (1) ovog člana.

(4) Za prekršaj iz stava (1) tačka a), b), c), d), e) i g) ovog člana izreće se i mjera oduzimanja imovinske koristi pribavljene prekršajem.

XI - ZAVRŠNE ODREDBE**Član 33.**

Karta i opis granica Zaštićenog pejzaža „Konjuh“ sa granicama pojedinih zaštićenih zona čuva se u Ministarstvu.

Član 34.

Ovaj zakon stupa na snagu osmog dana od dana objavljivanja u “Službenim novinama Tuzlanskog kantona”.

**Predsjednik
Skupštine Tuzlanskog kantona**

mr. sci. Amir Fazlić

Bosna i Hercegovina
Federacija Bosne i Hercegovine
TUZLANSKI KANTON
S K U P Š T I N A

Broj: _____
Tuzla, _____